

Parlamentario Rocco Tjon:

Si Rijkswet HOFA ta asina bon pa Aruba, dicon Gobierno no ta contesta pregunta?

SI e rijkswet aki ta asina beneficioso pa Aruba Gobierno no mester tin problema pa brinda claridad y contesta pregunta. Loke nos ta sigur caba ta cu e consecuencianan lo ta grandi pa Aruba y no positivo. Sinembargo Gobierno ta den silencio riba e supuesto beneficiacion.

Pregunta na gobierno

29 di augustus ultimo, pues dos siman pasa, a manda 13 pregunta pa Mike Eman pa haya claridad riba rijkswet HOFA (Houdbare Overheidsfinanciën Aruba). Preguntanan al caso pa haya sa kico e beneficio y efecto financiero anual ta pa Aruba pa e periodo di 2026 te 2040. Pero tambe nos kier wak tur conseho cu a ricibi pa tuma un decision asina grandi entre otro riba nivel economico social. E ultimo mas ainda despues cu evaluacion haci door di Hulanda riba e mesun ley aki na Corsou y Sint Maarten a sali negativo.

Negociacion door di gobierno

Parlamentarionan di AVP y Futuro ta bisa cu e mesun team di negociacion a keda traha. Pero obviamente esey ta riba



nivel di ambtenaar. Negociacionnan politico ta wordo haci door di Gobierno. Durante reunion den juli Mike Eman a bisa cu na comienso di augustus e lo cuminsa negocia cu Hulanda, y ya caba riba 13 di augustus e a entrega tur cos den man di Hulanda sin informa Parlamento. P'esey nos a manda haci pregunta tambe cuanto biaha nan a reuni riba nivel politico cu Hulanda riba e topico aki.

Pa conclui

Ta incomprendibel cu despues di dos siman, Gobierno ainda no por duna contesta riba e preguntanan basico. Si bo ta tuma un decision asina grandi cu tin consecuencia grave pa nos pais, bo tin cu tin e informacion aki disponibel mes ora.

Si e rijkswet HOFA ta asina bon pa Aruba, dicon Gobierno no ta duna transparencia?

Ex Prome Minister Evelyn Wever-Croes a ricibi e reconocimiento di 'The Wade's Family Endowment's Wreath for International Leadership'

RECIENTEMENTE Ex Prome Minister Evelyn Wever-Croes a ricibi e reconocimiento di The Wade's Family Endowment's Wreath for International Leadership. Ta trata di nan proyecto principal "The International Children's Memorial".

"The Wade Family Endowment" ta e hala filantropico di Kendal Wade Funeral Home LLC.

E reconocementonan cu e instancia ta otorga ta basa riba un legado extenso di compasion y servicio na comunidad.

Embahador Kendall Wade personalmente a bin Aruba pa entrega e reconocimiento aki na Evelyn Wever-Croes pa e trabou, servicio, dedicacion y sacrificio di Evelyn Wever-Croes y henter e gobierno durante e 7 año y mey di Gabinete Wever-Croes 1 y 2.

Embahador Kendall Wade a expresa "Your work, service and sacrifice has not, and will not go unnoticed".

